



SICONDA SESSIONE URDINARIA DI U 2017
RIUNIONE I 21 E 22 SETTEMBRE

N° 2017/O2/052

DUMANDA URALE POSTA DA U SGIÒ Cristofanu CANIONI
NON ISCRITTU

O Sgiò Presidente,

Da quì à pochi ghjorni i Catalanni si anu da prununzià via referendu inquantu à a so indipendenza. Issu avvenimentu maiò in a storia pulitica recente di a Spagna hè capace à avè cunsequenze pulitiche in Europa duv'elle ci sò situazione chì si assumiglianu. A reazione di Madrid, a sapete ch'ella hè chara è netta postu chì u pudere centrale hà dichjaratu senza alcun valore ghjuridicu issu referendu ed avà hà messu a Catalogna sottu tuttella finanziaria.

Al dilà di e cuntinuenze ghjuridicopulitiche trà Spagna è Catalogna, à noi ci inchieta u mudellu di sucetà di Presidente catalanu Carles Puigdemont. Quessu u mudellu hè multicultural è multicunfessionale. Ramentu chì a furmazione di u Presidente Puigdemont hè alleata cun Podemos, movimentu puliticu di manca estrema favurevule à l'immigrazione è chì u so secretariu generale, dimu la passendu, si hè dichjaratu oppostu à l'indipendenza di a Catalogna ed euroscetticu.

A Catalogna di u Presidente Puigdemont pare ch'ella sia u mudellu di sucetà arricumandatu da certi rispunsevuli di u naziunalisimu corsu. L'attenta recenti chì anu fattu morti anu messu in dolu i nostri amichi catalani : ci deve fà attenti chì sò u fruttu velenosu di issa pulitica chì porta à tumbà si à di per sè. L'avvenimenti di Corsica di u 2015 è u 2016, puru tenendu contu di e differenze cun noi ma sinu à quandu, sò u risultatu d'issa immigrazione non cuntrullata. O Sgiò Presidente, ci simu assuciati cù a vostra magiurità ogni volta ch'ella hè stata necessaria, nantu à parechji cartulari pè u bè di a Corsica è di i Corsi puru tenendu, di sicuru, a nostra libertà cumpletta di pensà è d'azione. Sci scrivimu in modu nettu è chjaru in u campu di i prugressisti. Ma a vi dimu in modu sulenne, issu mudellu di sucetà chì mette penseri è dinù trà i vostri, quessu ùn hè micca nostru per via ch'ellu cunduce à fà sparisce u nostru populu in un mischju senza garbu nè forma. O Sgiò Presidente chì per contu meiu ùn aghju nisun sintimu chì mi purtessi à righjittà à nimu ma aghju u penseru, cum'è voi, di chì sarà l'avvene di a mo terra, a Corsica è dinù quellu di i mo cumpatrioti. O Sgiò

Presidente, l'avete capita, dumanda ùn vi ne facciu, ma quantunque, una risposta l'aspettemu.

vi ringraziau.